

# A la tschertga da stgazis sut Cuira

Al di d'archeologia da sonda passada ha il Servetsch archeologic dal Grischun, ensemes cun Cuira Turissem ed il Museum retic, mussà insaquantas da las pli impurtantas exchavaziuns dals ultims onns.

Punct las 10.00 la sonda en damaun è ina gruppera da interessadas e interessads sa rimnada sin la plaza S. Martin a Cuira per far ina pitschna guida tras la citad veglia. Manà la guida ha Verena Gruber che maina er guidas turisticas per Cuira turissem. Dentant quella giada n'è quai betg stada ina purschida turistica, mabain in da plirs eveniments ch'il Servetsch archeologic, Curia Turissem ed il Museum retic han instradà per il di archeologic a Cuira – che ha gì lieu a schschun dals dis europeics da l'archeologia.

En traiss lieus da la citad veglia èn lura er stads staziunads archeologs che han mussà exchavaziuns ubain raquintà anecdotas. Ina da las pli impurtantas scuvertas dals ultims onns han ils archeologs chattà sut il Sennhof. Ina schablona da crap per far in ornament en furma d'ina crusch. «Savens chattain nus be l'ornament, uss avain nus chattà ina schablona che mussa

er exact co l'ornament veginva produci», di Bernd Heinze ch'ha preschentà differents stgazis en duas vitrinas.

## Betg be «merdas» da la civilisaziun

Il pli savens èn quels stgazis marenghins ubain ossa, savens dentant er sco ins di «merdas» da la civilisaziun sco scalgias ubain guaffens ruts. Dentant magari veginan er entiras apparaturas nauador, sco per exemplil il 2012 tar ina renovaziun d'ina chasa al Hegisplatz. Qua han ins chattà in entir furn da brischar vaider.

A la gruppera ch'ha participà sonda al di d'archeologia, ha plaschè la guida – il pli pitschen participant ha ditg ch'el vuless il pli gugent schizunt in'atgna tauna da far exchavaziuns sper la sablunera ed il pli gugent chattass el lien «in'entira fossa, e quai na faschess lura betg sgarschur, il spiert dal carstgaun na fiss gea lura betg pli en la fossa, quel fiss lura en il tschiel.»

## La curt è plain stgazis

Il proxim stop da la guida è stà tar la curt da l'uestgieu. Qua hajan ins chattà numerus stgazis. Mathias Seifert ch'è l'archeolog sin quest post da la guida ha er raquintà intinginas anecdotas. Per exemplil co l'ossa da Gieri Genatsch, ch'è suttèrri sin la curt, è veginida exchavada cun lubientscha da l'uestgieu duas giadas. L'emprima giada per conservar sia vestgadira, la secunda giada per controliar, sche l'ossa en la fossa tutga er propri tar Genatsch. Cun cumpareglier la DNS da ses skelet cun da quella da ses parents han ins pudì cumprovar, cun 98% probabladad, che propri Gieri Genatsch aveva chattà sia pasch en la fossa sin la curt. (rtr/fmr)

La guida archeologica duai proximamain vegnir prendida si en la purschida da guidas da Cuira Turissem.



Qua tar il Sennhof pon ins anc contemplar il vegl mir da la citad da Cuira.

FOTOS RTR